

Pol ndê bapia têḅ lau Galasia-ḅga

Yom whê bapia dindéc sa-ḅga

Aposel Pol to bapia dindéc têḅ lau sêkêḅ whiḅ-ḅga naḅ sêḅbo gamenḅ Galesia-ḅga. Muḅ-ḅga iḅ dau kêsêlêḅ tòm malac ma hoc ḅawaê ḅayham asê têḅ lau Galesia-ḅga, dec lau sic hu sêkêḅ whiḅ Yisu (Apo 13:14–14:23).

Tiḅambu lau Israel-ḅga ḅatô sêhóc asê gôlôwac dabuḅ Galesia-ḅga, ma sêḅsôḅ lau sêkêḅ whiḅ Yisu-ḅga si gauc pi lêḅ sêti lau gitêḅ yêc Anötö anḅô-ḅga. ḅac lau naḅ sêsap lau Israel-ḅga si sakiḅ akwa dônḅ, ma sêkac lau Galesia-ḅga bu sêḅkuc pwac sêsé launḅac si ḅamlic ḅatô su-ḅga, ma sêsóc Moses ndê yomsu hoḅ ḅapu. ḅac sêsôm bu lau sêkêḅ whiḅ Yisu-ḅga naḅ lau Israel dom, naḅ bu sêkôm bocd-inaḅ dom, dec oc tòm dom bu Anötö kôc ḅac sa me lic ḅac bu lau gitêḅ. Ma lau dau sêpu Pol ma sêsôm bu iḅ aposel ḅandô dom, ḅahu bu iḅ kac lau gamenḅ apa-ḅga bu sêḅkuc Israel si sakiḅ akwa dom.

Tu dinaḅ-ḅga Pol to bapia dindéc tu bu whê dau sa bu iḅ aposel ḅandô, naḅ Yisu Kilisi lu Anötö sêḅyalinḅ iḅ sa (1:1), ma gêm mêtê tòm Yisu dau hoc asê têḅ iḅ (1:12). Ma iḅ bu puc lau sêkêḅ whiḅ-ḅga dônḅ bu sêsóc lau tasanḅ dinaḅ si yom ḅapu dom. Iḅ sôm bu ḅawaê ḅayham tigenḅ iḅ yom ḅandô, ma ḅawaê dau tóc asê tiawê bu lau sêti lau gitêḅ tu ḅac si sêkêḅ whiḅ-ḅga, ma tu sêḅkuc yomsu-ḅga lec dom. Yêc lôcwha 5 - 6 iḅ to yom ḅatô tu bu puc lau dônḅ bu sêkêḅ whiḅ ḅaḅga, sêsap mêtê atac whiḅ-ḅga

dôḅ, ma sêpiḅ dau dôḅ ḅapep. Lau naḅ ḅalau Dabuḅ gêm gôliḅ ḅac, naḅ oc sêhu mêtê sac siḅ, ma sêkôm mêtê ḅayham eḅ (5:16-26).

Pol ndê yom ḅamata-ḅga

¹⁻² Aô Pol, ma asidôwai naḅ sêmbo sêwhiḅ aô, ato bapia dindec têḅ Kilisi ndê gôlôwac dabuḅ hoḅ yêc gameḅ Galesia-ḅga. Aô gati †aposeḅ magoc ḅamalac daḅ kêyaliḅ aô sa, me lau toḅ daḅ sêḅkiḅ aô bu wati aposel dom. Mba. Yisu Kilisi lu iḅ Damba Anötö naḅ uḅ iḅ sa akêḅ lau batê-ḅga, naḅ dec sêḅyaliḅ aô sa ti sêḅkiḅ aô. ³ Mwasiḅ ti yom malô têḅ mac akêḅ yac neḅ Damaḅ Anötö lu Pômdau Yisu Kilisi. ⁴ Yisu kêḅ dau mbac ndu tu yac neḅ sac-ḅga, bu êḅgaho yac su yêc mêtê sac naḅ gêm nom dindec ahuc. Lêḅ dau Damaḅ Anötö gauc gêm tidôḅ ma tac whiḅ bu Yisu kôm ḅandô sa. ⁵ Bocdinaḅ datoc Anötö ndê waê sa tôm têm sambob dandic ḅawaê. Yomandô!

Pol kêḅ puc lau bu sêḅkuc ḅawaê ḅayham tigeḅ

⁶ Tu Kilisi-ḅga dec Anötö kêmwasiḅ mac, ma kêgalêm mac sa ati iḅ ndê lau. Magoc ḅagahô eḅ, mac ahu iḅ ti ḅawaê ḅayham naḅ aposel sem, naḅ siḅ, ma aḅkuc yom wakuc. Mac nem lêḅ dinaḅ kôm aô gahêdaêḅ. ⁷ Yom naḅ mac aḅkuc, naḅ yom ḅandô dom. Mboe lau ḅatô sêḅsôḅ mac nem gauc ma sêḅsahê bu sêḅsôḅ ḅawaê ḅayham pi Kilisi whiḅ. ⁸ Aḅgô su naḅ! Yac daḅ me aḅela undambê-ḅga daḅ, me asa bu têḅ mac meḅ ma nem mêtê wakuc, naḅ so mêtê naḅ muḅ-ḅga yac ahoc asê têḅ mac, naḅ oc tap Anötö ndê atac ḅandê sa. ⁹ Aêc! Yac asôm su, ma aô wasôm tiyham. Asa naḅ bu hoc mêtê asê

têḡ mac naḡ so yac lau aposel mba mêtê naḡ mac akôc sa su, naḡ oc tap Anötö ndê atac ḡandê sa.

¹⁰ Mac gauc gêm sake? Aö gato yom dindec tu bu lau sêlic aö ḡayham ma sêmpinḡ aö-ḡga, me tu bu Anötö lic aö ḡayham-ḡga? Anḡô! Aö bu wakôm tu ḡamalac-ḡga, dec aö Kilisi ndê ḡgac akinḡ dom.

Pol whê sa bu inḡ Anötö ndê aposel ḡandô

¹¹ O asidôwai, aö bu wawhê sa têḡ mac bu mêtê naḡ gahoc asê têḡ mac, naḡ ḡamalac si yom dom.

¹² Bu ḡamalac danḡ kênḡ têḡ aö me kêdôhônḡ aö dom, magoc Yisu Kilisi hoc asê têḡ aö. ¹³⁻¹⁴ Mac anḡô aö ḡawaê su, dec anḡyalê bu muḡ-ḡga lê aö gam akinḡ Anötö kakuc lau Israel-ḡga si sakinḡ akwa. Aö gasa ḡac si lêḡ dau gahôc gêlêc ḡac si daêsam naḡ si yala gitôm aö neḡ. Ma gayêm daunḡ su tu wanḡkuc abanḡ Israel-ḡga si ḡagôlinḡ. Ma mac anḡô bu aö gakêḡ kisa ḡanḡga têḡ Anötö ndê gôlôwac dabunḡ naḡ sêkêḡ whinḡ Yisu, ma gakôm bu wasenḡ ḡac su.

¹⁵ Magoc Anötö kêyalinḡ aö sa gwananḡ su, têḡ têm aö gambo dinanḡ atac ḡalôm enḡ, ma tu inḡ ndê lêḡ êmwasiḡ lau-ḡga dec kêgalêm aö sa bu wanem akinḡ inḡ. Ma tinḡambu inḡ gêlic ḡayham ¹⁶ bu hoc inḡ ndê Atu Yisu asê têḡ aö, tu bu wasôm inḡ ndê ḡawaê ḡayham asê têḡ lau naḡ lau Israel dom. Têḡ dinanḡ aö gasôm yom gawhinḡ lau ḡatô dom. ¹⁷ Ma aö gapi Jerusalem bu walic lau naḡ sêti aposel sêmuḡ aö, naḡ dom. Mba. Aö gatêḡ gameḡ Arabia-ḡga ga, ma tinḡambu gambu gatêḡ malac Damaskas. ¹⁸ Aö gambo malac dinanḡ yala tö su, goc gapi Jerusalem ga bu walic Pita, ma gambo gawhinḡ inḡ tôm bêc 15.

¹⁹ Aö galic Pômdau asi Jems, magoc galic aposel ḡatô dom. ²⁰ Aö wasôm yêc Anötö anḡô-ḡga bu

yom nan kwahic dec gato, nan yom tasan dom.
²¹ Tinambu aö gatêñ gameñ Siria ma Silisia-nga ga.
²² Gôlôwac dabun gameñ Judia-nga nan sêkêñ whin
 Kilisi, nan sêlic aö anôn andô dom. ²³ Magoc sêngô
 ñawaê pi aö bocdec bu, “Ngac nan mun-nga kên kisa
 têt yac, kwahic dec kôm gwelen ma gêm mêtê pi
 lêt dakên whin-nga nan mun-nga in kôm bu sen
 su.” ²⁴ Bocdinañ sêmpin Anötö tu in gêm aö kwi-
 nga.

2

Lau aposel Jerusalem-nga sêkôc Pol sa

¹ Yala 14 ginnga su goc gapi Jerusalem ga tiyham,
 ma gakôc Banabas lu Taitus sêwhin aö. ² Anötö
 dau hoc yom dan asê têt aö ma kac aö, dec gapi
 Jerusalem ga têt ndoc dinañ. Ma ñawaê ñayham
 nan gahoc asê têt ðlau gameñ apa-nga, nan aö
 gawhê sa yêc Jerusalem. Aö gawhê sa têt lau hon
 dom, magoc gawhê sa têt lau sêkêñ whin-nga si lau
 bata. Aö gatec bu lau sêpu gwelen nan gakôm, me
 sêsôm bu aö gakôm ñambwa, ma tu dinañ-nga dec
 gawhê dauñ sa têt ñac lau dau. ³ Ñac sênyalê bu
 Taitus nan whin aö têt têt dinañ, in ñac Grik-nga.
 Magoc sêkac yac bu asê in ndê ñamlic ñatô êñkuc lau
 Israel-nga si pwac nan dom.

⁴ Yom hon dinañ hóc asê, ñahu bu lau ñatô sêñsau
 bu sêti yac mba asidôwai ma sêmen sêmbo sêwhin
 yac bu sêtip lêt ti sakin nan yac andôhôn têt
 lau gameñ apa-nga. Yisu Kilisi kêgapwêc yac su
 yêc sakin yomsu-nga, magoc ñac lau tasan dinañ
 sêkôm bu sêkac yac kwi ma ankc lêt yomsu-nga
 tiyham atôm lau akin ñambwa. ⁵ Tigen yac alhac

ɲaɲga ma asôc ɲac ɲapu daɲ dom, ɲahu bu yac atac whiɲ bu mac lau Galesia-ɲga aɲyalê yom ɲandô pi ɲawaê ɲayham, ma asap dôɲ ɲapaɲ.

⁶ Aô kayalê bu Anötö toc ɲamalac daɲ sa hôc gêlêc daɲ su dom. Tu dinaɲ-ɲga dec gahêgo daɲ dom têtɲ ndoc naɲ gawhê daɲ sa têtɲ lau naɲ gôlôwac dabuɲ Jerusalem-ɲga sêtoc sa sêti ɲac si lau bata. Ma ɲac sêsôm yom daɲ bu sêmatôc ɲawaê ɲayham naɲ gam yêc lau apa si gameɲ, naɲ dom. ⁷ Mba! ɲac sêlic bu Anötö kêɲ ɲawaê ɲayham sip aô amanɲ bu wahoc asê têtɲ lau naɲ lau Israel dom, tôm iɲ kêɲ sip Pita amba bu hoc asê têtɲ lau Israel-ɲga. ⁸ Bu Anötö kêɲ ɲaclai têtɲ Pita ma kêyalɲ iɲ sa ti lau Israel-ɲga si aposel, ma kêɲ ɲaclai têtɲ aô bocdinaɲ, ma kêyalɲ aô sa gati lau gameɲ apa-ɲga si aposel. ⁹ Lau sêkêɲ whiɲ-ɲga yêc Jerusalem sêtoc Jems, Pita ma Jon sa sêti ɲac si ɲagôlônɲ. Ma têtɲ ndoc lau töt dinaɲ sêlic bu aô gatap Anötö ndê mwasiɲ sa su, dec sêkam alu Banabas tu bu sêtôc asê bu ɲac sêkôc alu ti alu mba yom sa. Ma ɲac si ɲalôm pitigeɲ bu yac akôm gwelenɲ ɲawaê ɲayham-ɲga awhiɲ lau gameɲ apa-ɲga, ma ɲac sêkôm sêwhiɲ lau Israel-ɲga. ¹⁰ ɲac sêndac gêtɲ tigeɲ, naɲ bu yac gauc nem ɲac si lau naɲ sêpônɲa dau. Ma gêtɲ dau aô gauc gêm tidônɲ su bu wakôm.

Pol sôm Pita yêc malac Antiok

¹¹ Tiɲambu aô gambo malac Antiok, ma Pita meɲ mbo malac dau whiɲ. Magoc malô aô galic yêc awê bu iɲ kôm gêtɲ daɲ, naɲ so yom ɲandô ɲawaê ɲayham-ɲga. Ma tu dinaɲ-ɲga dec aô gasôm yom sêmbalaɲ-ɲga solop têtɲ iɲ. ¹² Bu têtɲ ndoc iɲ hôc asê Antiok tiwakuc, naɲ iɲ kôm mêtê solop. Iɲ

ndöc ti gên gên whin lau sêkên whin-nga nan lau Israel dom, dec tôc asê bu in hêgo dau tu Moses ndê yomsu-nga dom. Magoc tinambu lau Israel-nga natô nan sem gwelenj sêwhin Jems, nan sêhóc asê malac Antiok. Pita kêyalê bu nac sêsap Moses ndê yomsu dôn ma nac bu sêkac lau gamej apa-nga bu sênkuc lau Israel-nga si t̄pwac sêsê laungac namlic natô su-nga. Tu dinan-nga dec in t̄oc dau ma kêdahin dau su yêc lau nan lau Israel dom. In ndê lên dau in lên giso. ¹³ Ma lau sêkên whin-nga Israel-nga natô nan sêmbo malac Antiok, nan sênkuc in ma sêsa lên tasan dinan sêwhin, e lên dau hê Banabas kwi whin. ¹⁴ Têj ndoc aô galic bu nac si mêtê dau so yom nandô nawae najham-nga, dec gasôm yom têj Pita yêc nac honj anjô-nga bocdec bu, “Am ngac Israel-nga, magoc têj ndoc am mwenj hóc asê malac Antiok, nan am mbo whin lau nan lau Israel dom, ma hêgo daôm tu Israel-nga si yomsu-nga dom. Magoc malô am kac nem najôm kwi ma kôm gitôm am gêlic Moses ndê yomsu gitôm gên atu, ma hu lau dau sinj ma mbo ahê nac. Bocke? Kwahic dec am bu kac lau gamej apa-nga bu sêsôc lau Israel-nga si najôlinj naju, a?”

Lên tigenj yêc bu dati lau gitên, nan dakên whin

¹⁵ Ma aô gasôm têj Pita, “Yac lau Israel-nga êlêmê dasam lau gamej apa-nga bu lau sac, bu nac sênkuc Moses ndê yomsu dom. Magoc hêclu nej naju yêc lau gamej apa-nga dom. Mba. Dinanji sêkóc hêclu dambo lau Israel-nga nan dakóc Moses ndê yomsu, nan najôm. ¹⁶ Magoc yac tanjalê su bu namalac danj oc ti namalac gitên yêc Anötô anjô-nga tu in kêkuc lên yomsu-nga dom. Mba, oc tôm dom. Magoc tu

ɲamalac daɲ kɛɲ whiɲ Yisu Kilisi-ɲga, dec Anötö gêlic iɲ bu ɲamalac gitêɲ. Seɲ tigeɲ dinaɲ gic lau hoɲ ɲawaê, yac lau Israel-ɲga, ma lau gameɲ apa-ɲga boc-dinaɲ. Taɲkuc lêɲ dakêɲ whiɲ Yisu Kilisi-ɲga tu bu dati lau gitêɲ tu lêɲ dinaɲ-ɲga, ma tu taɲkuc lêɲ yomsu-ɲga lec dom.”

¹⁷ Kwahic dec yac taɲkuc lêɲ dakêɲ whiɲ Kilisi-ɲga tu bu dati lau gitêɲ-ɲga. Mboe lau ɲatô oc sêsam yac bu lau sac tu yac taɲkuc lêɲ yomsu-ɲga tiyham dom. Magoc yac oc dasôm sake? Lêɲ dakêɲ whiɲ Kilisi-ɲga kɛɲ ɲasawa têɲ yac tu dakôm sac-ɲga, a? Aö wasôm, mba andô! ¹⁸ Muɲ-ɲga aö kasahê bu wati ɲgac gitêɲ tu kakuc yomsu-ɲga, magoc kwahic dec gahu lêɲ dau siɲ su. Aö bu wambu wandi wasôc yomsu ɲapu tiyham, dec oc tôc gêɲ tigeɲ asê têɲ aö, naɲ bu aö ɲgac kagilì yomsu-ɲga. ¹⁹ Bu sakin yomsu-ɲga tôc asê têɲ aö bu gawêkaiɲ seɲ wambac ndu-ɲga, ma bocdinaɲ dec aö taɲkwê lêɲ yomsu-ɲga bu nem aö sa tiyham lec dom. Yomandô. Aö gahu lêɲ yomsu-ɲga siɲ, tu bu wanem akiɲ Anötö tôm aneɲ bêc hoɲ wambo taɲli-ɲga. Anötö dau piɲ aö dôɲ gam damiɲ Kilisi gitôm gambac ndu pi a gicso dau gawhiɲ iɲ. ²⁰ Ma kwahic dec aneɲ ɲahu gambo taɲli-ɲga sip aö dauɲ dom, magoc gambo taɲli tu Kilisi naɲ tisa mbo tali tiyham ma mbo aneɲ ɲalôm naɲ-ɲga. Ma tôm bêc hoɲ naɲ wambo taɲli wambo nom lec, naɲ wasa lêɲ tigeɲ bocdec bu, wakêɲ whiɲ Anötö Atu naɲ tac whiɲ aö ma kɛɲ dau tu aö-ɲga. ²¹ Aö galic Anötö ndê mwasiɲ gitôm gêɲ ɲambwa dom. Mba. ɲahu bu ɲamalac daɲ gitôm dom bu ti ɲamalac gitêɲ tu iɲ kêkuc yomsu-ɲga. Bu bocdinaɲ, dec Kilisi ndê mbac ndu naɲ oc

ŋahu mbasi.

3

Lêŋ yomsu-ŋga ma lêŋ dakêŋ whiŋ-ŋga

¹ O mac lau Galesia-ŋga, mac lau gauc mba. Yac awê yom hoŋ pi Yisu Kilisi sa yêc awê têŋ mac, e tòm mac daôm tanôm alic iŋ mbac ndu pi a gicso dau. Magoc asa dec meŋ ma kêŋsôŋ mac nem gauc? ² Aô bu wakêŋ gêndac têŋ mac pi yom tigen bocdec bu, mac aŋkuc yomsu dec Anötö kêŋ Nalau Dabuŋ têŋ mac, me mac akêŋ whiŋ ŋawaê ŋayham pi Kilisi, naŋ mac aŋgô su, dec iŋ kêŋ Nalau têŋ mac? ³⁻⁴ Bocke ma kwahic dec mac nem gauc tisac? Têŋ ndoc mac akêŋ whiŋ tiwakuc, naŋ mac asa nem lêŋ ti Nalau Dabuŋ ndê ŋaclai, ma ahu lêŋ yomsu-ŋga siŋ. Tu dinaŋ-ŋga lau naŋ sêsap yomsu dôŋ, naŋ sêkêŋ kisa mac. Tu sake-ŋga kwahic dec mac buambu asôc yomsu ŋapu tiyham, ma gauc gêm bu Anötö oc kôc mac sa tu gêŋ naŋ mac daôm akôm tu aŋkuc yomsu-ŋga. Mac bu akôm bocdinaŋ, dec kisa atu naŋ mac ahôc têŋ ŋamata-ŋga, naŋ ŋahu mbasi. ⁵ Aŋgô! Anötö kêŋ ndê Nalau Dabuŋ têŋ mac ma kôm gêŋ dalô daêsam yêc mac aŋôm-ŋga. Iŋ kôm gêŋ dau tu mac aŋkuc yomsu-ŋga, me tu mac akêŋ whiŋ yom pi Kilisi, naŋ mac aŋgô su-ŋga?

⁶ Gauc nem Abraham. Iŋ kêŋ whiŋ Anötö, ma tu dinaŋ-ŋga Anötö gêlic iŋ bu ŋgac gitêŋ. ⁷ Bocdinaŋ aŋyalê bu lau hoŋ naŋ sêŋkuc lêŋ sêkêŋ whiŋ-ŋga, naŋ Anötö gêlic ŋac sêtôm Abraham ndê lau wakuc. ⁸ Yom naŋ sêto yêc, naŋ tôc asê gwanan bu Anötö oc lic lau naŋ lau Israel dom, naŋ bu lau

gitêḅ, tu ḅac si sêkêḅ whiḅ-ḅga. Anötö sôm ḅawaê ḅayham dau asê têḅ Abraham gwananḅ su bocdec bu:

Lau nom-ḅga hoḅ oc sêtap aneḅ mbec ḅamwasinḅ sa yêc am. *[Gen 12:3]*

⁹ Abraham kêḅ whiḅ, dec tap Anötö ndê mbec ḅamwasinḅ sa. Ma bocdinaḅ lau hoḅ nanḅ sêkêḅ whiḅ, nanḅ oc sêtap mbec dau ḅamwasinḅ sa sêwhiḅ Abraham. ¹⁰ Magoc lau hoḅ nanḅ gauc gêm bu ḅac oc sêti lau gitêḅ tu sêḅkuc yomsu-ḅga, nanḅ oc sêtap Anötö ndê tac ḅandê sa, tôm yom danḅ nanḅ sêto yêc, nanḅ sôm bocdec bu:

Asa nanḅ kêkuc yomsu hoḅ nanḅ sêto sip buku yomsu-ḅga, nanḅ ḅapep ma timala dom, nanḅ oc tap Anötö ndê tac ḅandê sa. *[Diut 27:26]*

¹¹ Ma yom danḅ tiyham sêto yêc bocdec bu:

Lau gitêḅ oc sêndöc tali tu ḅac si sêkêḅ whiḅ-ḅga. *[Hab 2:4]*

Yom dau tôc asê tiawê bu ḅamalac danḅ oc ti ḅamalac gitêḅ yêc Anötö anḅô-ḅga tu inḅ kêkuc yomsu-ḅga dom. ¹² Lêḅ yomsu-ḅga sôm bu ḅamalac nanḅ tôm bu sa ndê lêḅ êḅkuc yomsu hoḅ ḅapep eḅ, nanḅ oc ndöc tali. Magoc lêḅ yomsu-ḅga dinaḅ so lêḅ dakêḅ whiḅ-ḅga. ¹³ Asa nanḅ takwê lêḅ yomsu-ḅga bu nem inḅ sa, nanḅ gic waê bu tap Anötö ndê atac ḅandê sa. Magoc Kilisi kêgaho yac su yêc lêḅ datap atac ḅandê dinaḅ sa-ḅga. Inḅ dau hôc Anötö ndê atac ḅandê tu yac-ḅga, tôm yom nanḅ sêto pi lau sac, nanḅ yêc bocdec bu:

Lau hoḅ nanḅ sêkêḅ ḅac sêḅgalêḅ a, nanḅ dalic ḅac gitôm lau nanḅ sêtap Anötö ndê tac ḅandê sa. *[Diut 21:23]*

¹⁴ Yisu Kilisi hôc n̄andê dinan̄ tu bu lau nan̄ lau Israel dom, nan̄ dec oc sêtap Abraham ndê mbec n̄amwasin̄ sa sêwhin̄ lau Israel-n̄ga. Ma yac hon̄ oc dakôc N̄alau Dabuñ, nan̄ Anötö gic bata su, nan̄ sa tu yac neñ dakêñ whin̄ Yisu-n̄ga.

Pwac yomsu-n̄ga, ma pwac mwasin̄-n̄ga

¹⁵ O asidôwai, wanem dôhôn̄ pi n̄amalac si lêñ bu wawhê gêñ dau sa. Pwac nan̄ n̄amalac lu sêmatin̄ tidôn̄ su, nan̄ oc tòm dom bu n̄gac dan̄ ndic têku, me señ su. Ma Anötö ndê pwac bocdinan̄. ¹⁶ In̄ gic bata yom têñ Abraham ma sôm bocdec bu, “Aö oc wanem mbec am ti nem wakuc.” Yom nan̄ in̄ sôm pi Abraham ndê wakuc, nan̄ hêganôn̄ lau daêsam dom, magoc hêganôn̄ Abraham ndê n̄gac wakuc tigen̄, nan̄ Kilisi dau. ¹⁷ Aö wasôm têñ mac bu Anötö gic bata yom dau têñ Abraham mun̄ su, ma tiñambu yala 430 gin̄ga su, dec in̄ kêñ ndê yomsu têñ lau Israel-n̄ga. Magoc yomsu dau señ pwac mwasin̄-n̄ga nan̄ Anötö kêmatin̄ whin̄ Abraham, nan̄ su dom. ¹⁸ Lau bu sêtap Anötö ndê mwasin̄ sa tu sêñkuc yomsu-n̄ga, nan̄ dec lêñ dau kêkuc yom nan̄ Anötö gic bata têñ Abraham, nan̄ dom. Magoc bocdinan̄ dom. Bu Anötö gic bata yom têñ Abraham ma sôm bu êmwasin̄ in̄ n̄ambwa.

¹⁹ Bocdinan̄ Anötö kêñ yomsu n̄ahu bocke? In̄ kêñ tu bu tôle n̄amalac si sac asê-n̄ga, bu lhac e Abraham ndê wakuc nan̄ Anötö gic bata yom pi in̄, nan̄ hoc asê. Ma gêñ dan̄ tiyham. An̄ela sêkôc Anötö ndê yomsu ma sêkêñ têñ n̄gac n̄alhu-n̄ga dan̄, nan̄ Moses. ²⁰ N̄gac n̄alhu-n̄ga dau kôm gwelen̄ mbo Anötö ma lau Israel-n̄ga n̄alhu ma kôc yomsu. Magoc pwac mwasin̄-n̄ga nan̄ Anötö kêmatin̄ whin̄

Abraham, naŋ inɗ dau kêŋ solop têtŋ inɗ, ma ŋgac ŋalhu-ŋga mbasi.

Yomsu oc tôc yac neŋ sac asê, ma wê yac datêŋ Kilisi dandi

²¹ Bocdinaŋ wandac mac bocdec bu, yomsu seŋ mwasinɗ naŋ Anötö gic bata tidôŋ bu kêŋ têtŋ Abraham naŋ su, me? Wasôm têtŋ mac bu mba andô. Yac bu datôm bu datap seŋ dandöc taŋli-ŋga sa yêc yomsu, dec yomsu dau oc ti yac neŋ seŋ dati lau gitêŋ-ŋga. ²² Magoc oc tôm dom. Anötö ndê yom naŋ sêto yêc, naŋ whê sa bu lau nom-ŋga hoŋ sêndöc gapocwalô sac-ŋga. Ŋalêŋ dinaŋ mwasinɗ naŋ Anötö gic bata, naŋ hêganôŋ lêtŋ dakêŋ whinɗ-ŋga, ma datap mwasinɗ dau sa tu dakêŋ whinɗ Yisu Kilisi-ŋga.

²³ Muŋ-ŋga, lêtŋ dakêŋ whinɗ-ŋga dinaŋ meŋ sa tiawê su dom. Têtŋ têtŋ dinaŋ yac dambo datôm lau gapocwalô-ŋga naŋ yomsu sô yac dôŋ, bu dambo bocdinaŋ e Anötö tôc lêtŋ dakêŋ whinɗ-ŋga asê tiawê. ²⁴ Anötö kêŋ yomsu bu nem gôlinɗ yac ma tôc yac neŋ sac asê, goc wê yac datêŋ Kilisi dandi, bu datap lêtŋ dati lau gitêŋ-ŋga sa tu yac neŋ dakêŋ whinɗ inɗ-ŋga. ²⁵ Ma kwahic dec lêtŋ dakêŋ whinɗ-ŋga meŋ sa su, dec dambo yomsu ŋapu tiyham dom.

Dati Anötö atuwêi ti ŋgac

²⁶ Mac hoŋ ati Anötö ndê balêkoc tu mac nem akêŋ whinɗ Yisu Kilisi-ŋga. ²⁷ Bu mac hoŋ naŋ alinɗ busaŋgu, naŋ gêtŋ dau piŋ mac dôŋ am daminɗ Kilisi, tôm mac asôc inɗ ti nem ŋakwê. ²⁸ Ma Anötö kôc mac sa kêkuc mac nem ŋahu nom-ŋga dom. Mba. Mac bu lau Israel-ŋga, me lau apa, lau akinɗ ŋambwa

me lau nañ dau sêmbô si gêñ, lauwhê me launḡac, tigen anyalê bu Anötö kôc yac hoñ sa tu yac neñ dakêñ whiñ Yisu Kilisi-ñga, nañ piñ yac hoñ dôn dapitigen. ²⁹ Ma mac lau asa nañ ati Kilisi ndê, nañ ati Abraham ndê lau wakuc bocdinañ, ma awêkain mwasiñ nañ Anötö gic bata têñ Abraham.

4

¹ Aô wawhê gêñ dau sa têñ mac bocdec bu. Balê nañ damba gic bata bu kêñ ndê wapa lêñsêm têñ iñ, nañ oc wêkain gêñ dau yomandô. Magoc damba bu mbac ndu têñ ndoc iñ mbo balê, dec iñ oc kôc wapa dau sep dom, ma iñ oc mbo gitôm damba ndê ḡac akiñ ḡambwa dañ. ² Ma lau ḡatô oc sêyob iñ ti ndê wapa lêñsêm e iñ ndê yala gitôm nañ damba sôm tidôñ ḡwanañ su. ³ Ma yac bocdinañ. Muñ-ḡga yac dakêñ whiñ su dom, nañ dambo datôm balêkoc saun, ma datôm lau akiñ ḡambwa nañ dambo yomsu ti ḡagôlin nom-ḡga ḡapu. ⁴ Magoc têñ ndoc nañ Anötö sôm ḡwanañ su, nañ meñ sa, goc iñ kêñ ndê Atunḡac meñ mbo nom. Iñ dinda kôc iñ ti ḡamalac nom-ḡga nañ mbo yomsu ḡapu, ⁵ bu êñḡapwêc yac lau nañ dambo yomsu ḡapu, nañ su, ma yac dati Anötö ndê balêkoc. ⁶ Ma Anötö kêñ ndê Atu ndê ḡalau sip yac hoñ neñ ḡalôm, dec tôc asê bu mac lau gameñ apa-ḡga ati Anötö ndê balêkoc awhiñ yac lau Israel-ḡga. Ma ḡalau dau ḡêm yac sa dec data Anötö ti atac pa su, ma dasam iñ bu, “Damañ, Damañ.” ⁷ Bocdinañ kwahic dec yac lau akiñ tiyham dom, magoc yac Anötö ndê balêkoc solop. Ma yac dati Anötö ndê balêkoc, dec dawêkain gêñ lêñsêm nañ gic waê iñ ndê balêkoc.

Pol ñalôm ñawapac tu lau Galesia-ña

⁸ Muñ-ña mac am gauc Anötö, ma am akind gën nom-ña ñambwa nañ Anötö ñandô dom. ⁹ Magoc kwahic dec mac añyalê Anötö, ma gën atu dañ whin bocdec bu, Anötö dau kêyalê mac su. Ma bocke dec mac bu akac daôm kwi, ma ambu andi asôc yomsu ñapu, dec ambo atôm lau akind tiyham? Bu yomsu hon, nañ ñagôlin nom-ña ñambwa nañ ña-ñaclai ti ñandô mbasi. ¹⁰ Tu sake-ña mac bu añkuc ñagôlin ñambwa nañ hêganôn bêc ti ayô, ma yala ti têm ñatô? ¹¹ Aö gatôc dauñ tu mac-ña bu mboe gwelen nañ aö gakôm têt mac, nañ oc ñandô mbasi. ¹² O asidôwai. Muñ-ña mac lau apa ambo yomsu ñapu dom, ma aö gahu lêt yomsu-ña sin tu bu wambo watôm mac. Magoc kwahic dec lau ñatô sêñsau mac, dec mac ambo atôm lau akind tiyham tu yomsu-ña. Bocdinañ dec water ma bu ahu lêt dinañ sin ma ambo atôm aö. Ma alic aö ñayham tôm muñ-ña nañ aö gambo gawhin mac, nañ mac akôm aö sac dom. ¹³ Têt têt dinañ gëmbac kôm aö, dec gambo tet gawhin mac, ma gahoc ñawaê ñayham asê têt mac. Mac añyalê gën dau su. ¹⁴ Aneñ gëmbac dau kêt ñawapac têt mac bu ayob aö, magoc mac apu aö me alic aö sac dom. Mba. Mac akôc aö sa gitôm Anötö ndê añela dañ, me tôm mac akôc Yisu Kilisi dau sa. ¹⁵ Têt ndoc dinañ mac atac whin bu anem aö sa êñlêc, e tôm mac bu akip nem tanôm ñakôp sa ma akêt têt aö. Yomandô. Magoc kwahic dec mac nem atac ñayham tu aö-ña ginça su. ¹⁶ Bocke? Tu aö gasôm yom ñandô asê têt mac-ña, dec kwahic mac alic aö tôm nem ñacyo, a?

¹⁷ Nac lau tasan dinañ sêkôm ñannga bu sêkac mac

kwi asôc yomsu n̄apu tiyham. Magoc sêkôm tu mac atap n̄andô n̄ayham dan sa-n̄ga dom. N̄ac atac whiñ bu mac ahu aö siñ ma akêñ daôm sambuc tu añkuc n̄ac-n̄ga. ¹⁸ In lêñ n̄ayham bu mac akêñ daôm sambuc tu bu akôm gêñ nan n̄ahu n̄ayham yêc. Ma aö bu wambo wawhiñ mac, me aö bu wambo dom, magoc akôm bocdinañ n̄apañ.

¹⁹ O aneñ balêkoc awhê ma n̄gac. Kwahic dec aö kasahê n̄andê atu tiyham tu mac-n̄ga, gitôm awhê nan balêkoc tun in. N̄ahu bu aö tac whiñ ndu andô bu Kilisi ndê yom tidôn yêc mac nem n̄alôm, e andi atôm in dau. ²⁰ Aö neñ n̄alôm n̄awapac atu tu mac-n̄ga, ma señ dan bu hôc pi aö, dec aö atac whiñ kêlêc bu wambo wawhiñ mac, ma wasôm yom n̄ayham-n̄ayham têñ mac, ô yom n̄an̄ga nan kwahic dec gato têñ mac.

Sara lu Haga sêti n̄adôhôn̄

²¹ Mac lau nan atac whiñ bu ambo yomsu n̄apu, aö bu wandac mac bocdec bu. Mac an̄yalê señ nan yomsu bu wê mac atêñ andi, me mba? ²² Gauc nem yom nan sêto yêc pi balêkoc n̄gac lu nan Abraham kwê asê. Balê dan dinda Haga in awhê akiñ n̄ambwa, ma balê dan dinda Sara in awhê akiñ dom, in Abraham nawhê solop. ²³ Haga kôc balêkoc kêkuc n̄amalac nom-n̄ga si lêñ n̄ambwa. Magoc Sara kôc balêkoc kêkuc yom nan Anötö gic bata têñ Abraham. ²⁴⁻²⁵ Gêñ dau in gitôm yom gôlin dan, bu awhê lu dinañ sêti pwac lu n̄adôhôn̄. Haga ti dôhôn̄ pwac akwa yomsu-n̄ga nan Anötö kêmatin yêc Lôc †Sainai yêc gameñ Arabia-n̄ga. Ma balêkoc pwac dinañ-n̄ga sêti lau akiñ n̄ambwa tôm Haga.

Ma Haga ti dôhôn malac Jerusalem têm dindec-nga, bu malac dau ti ndê lau sêmbô sêtôm lau akiñ nambwa bocdinañ. ²⁶ Magoc Sara ti dôhôn malac Jerusalem wakuc nañ yêc undambê, ma inñ gitôm yac neñ dinañ nandô nañ awê akiñ nambwa dom.

²⁷ Bu sêto yom dan yêc bocdec bu:

Am awê gapoc nañ kôc balêkoc dom, atac nayham sa. Am nañ kêsahê balêkoc tun am dom, nañ mbwêc ti atac nayham. Bu kwahic dec am mbo gitôm awê nañ balêkoc mba, magoc tinambu am oc tap nem balêkoc sa hôc gêlêc awê nañ gêm ngac sa, nañ su.* [Ais 54:1]

²⁸ Aneñ asidôwai. Tu Kilisi-nga dec mac ati balêkoc pwac mwasin-nga gitôm Aisak, balêkoc nañ hôc asê kêkuc yom nañ Anötö gic bata têt Abraham. ²⁹ Muñ-nga Ismael, balêkoc nañ hôc asê kêkuc namalac si lêt, nañ kêt kisa Aisak, nañ hôc asê na Nalau Dabuñ ndê naclai. Ma kwahic dec mac anshê kisa nalêt kain tigen yêc lau nañ sêsap lêt yomsu-nga dôñ. ³⁰ Magoc gauc nem yom nañ sêto yêc bocdec bu:

Kêt awê akiñ lu inñ atungac sêlhô sêndi, bu awê akiñ ndê balê dau oc wêkain wapa lêt sêm natô

* **4:27:** Aisaya to yom dau pi malac Jerusalem têt ndoc nacyo sêngaho lau Israel-nga su ma sêkôc nac sa si sêndôc gamen Babilon-nga gitôm lau gapocwalô-nga. Aisaya gêlic bu malac dau tigan, dec gêm dôhôn pi awê gapoc. Pol kôc Aisaya ndê yom ma to sip inñ ndê bapia têt lau Galesia-nga bu whê yom nañ inñ to pi malac Jerusalem lu, nañ sa. Yom pi awê nañ gêm ngac sa su, nañ hêganôn lau Israel-nga ma malac Jerusalem akwa. Ma yom pi awê gapoc nañ oc tap balêkoc daêsam sa, nañ hêganôn lau sêkêt whin Yisu-nga nañ oc sêndôc malac Jerusalem wakuc.

whiŋ ɲadawê ndê atunɣac dom. *[Gen 21:10]*

³¹ Bocdinaŋ asidôwai, akôc gauc ɲaŋga bocdec bu. Yac awhê akiŋ Haga ndê balêkoc dom, magoc yac ɲadawê Sara ndê balêkoc solop.

5

Dasap lêŋ dakêŋ whiŋ-ɲga dôŋ, bu Kilisi kêgapwêc yac su yêc lêŋ yomsu-ɲga

¹ Kilisi kêgapwêc yac su dec dambo datôm lau akiŋ ɲambwa tiyham dom. Bocdinaŋ alhac ɲaŋga, ma ayob daôm bu wapac lêŋ yomsu-ɲga êŋgwiniŋ mac e ati lau akiŋ tiyham dom. ² Aô Pol wasôm têŋ mac bu asa naŋ gauc gêm bu ti ɲgac gitêŋ tu iŋ kêkuc yomsu sêsê launɣac ɲamlic ɲatô su-ɲga, naŋ Kilisi gitôm dom bu oc nem iŋ sa. ³ Aô wasôm tiyham têŋ mac, bu asa naŋ sôc yomsu tigenɲ dinaŋ ɲapu, naŋ êŋkuc yomsu hoŋ bocdinaŋ ndic ɲawaê. ⁴ Mac lau naŋ gauc gêm bu ati lau gitêŋ tu aŋkuc yomsu-ɲga, naŋ akac daôm su yêc Kilisi ma yêc Anötö ndê mwasiŋ. ⁵ ɲahu bu Anötö gêlic yac tôm lau gitêŋ tu yac neŋ dakêŋ whiŋ-ɲga. Ma ɲalau Dabuŋ puc yac dôŋ bu dahôŋ ti dakêŋ batanɲ gêŋ dau ɲa-ɲandô. ⁶ Bu yac lau naŋ dati Yisu Kilisi ndê, naŋ tanjalê bu lêŋ yomsu-ɲga danɲ oc nem yac sa ɲandô dom. ɲac bu sêsê yac ɲamlic ɲatô su, me sêsê yac dom, naŋ dalic tôm gêŋ ɲambwa. Gêŋ tigenɲ yac dalic bu gêŋ atu, naŋ dakêŋ whiŋ Kilisi. Ma yac neŋ mêtê atac whiŋ neŋ asidôwai-ɲga tôc yac neŋ dakêŋ whiŋ asê.

⁷ Muŋ-ɲga lê, mac asa nem lêŋ akêŋ whiŋ-ɲga ɲapep eŋ, atôm lau naŋ sênti ɲaŋga. Tigenɲ asa kalhac mac ahuc e ahu yom ɲandô siŋ? ⁸ Lau

nañ sêlhac mac ahuc, nañ sêmen akêñ Anötö nañ kêgalêm mac sa, nañ ndê dom. ⁹ Ayob daôm ñapep têtñ lau kainñ dinañ, bu yom nañ ñac sêndôhôn, nañ gitôm yist nañ sêkêñ sip bolom ñalôm ma kôm gwelenñ malô-malô e gêm bolom sambuc ahuc. ¹⁰ Tu Kilisi piñ yac hoñ dôñ-nga, dec gakêñ whiñ bu mac oc akôc aneñ yom dindéc sa, ma atec yom bambaliñ hoñ. Ma asa nañ bu lhac mac ahuc ma êñsôn mac nem gauc, nañ oc tap iñ ndê gwelenñ dau ñagêyô sa.

¹¹ O asidôwai, lau ñatô sêñgôliñ yom pi aö ma sêsôm bu aö gam mêtê ma gapuc yomsu sêsê ñamlic ñatô su-nga dôñ. Anğô su nañ. Aö bu wapuc yomsu dau dôñ, dec tu sake-nga lau Israel-nga nañ sêsap yomsu dôñ, nañ sêkêñ kisa aö? Ma aö bu wapuc yomsu dau dôñ, dec yom nañ yac ahoc asê pi Yisu ndê mbac ndu pi a gicso dau, nañ dec oc wakôm nditôm yom ñambwa. Yom pi Yisu ndê mbac ndu, nañ gitôm hoc nañ lau Israel-nga daêsam sêtiñ gahi pi-nga. ¹² Oc ñayham bu lau nañ sêñgilí mac bu añkuc yomsu sêsê ñamlic ñatô su-nga, nañ sêtim dandi ñamlic sambuc kic-kic.

¹³ O aneñ asidôwai. Anötö kêgalêm mac sa bu ambo atôm lau akiñ yomsu-nga dom. Tigen iñ ndê galem dinañ kêtñ ñasawa têtñ mac bu akôm sac tôm ñalôm akwa kêtñ mac dom. Mba! Anem akiñ asidôwai ti añkuc mêtê atac whiñ-nga. ¹⁴ Bu yomsu hoñ sôc yomsu tigen ñapu, nañ yêc bocdec bu, “*Am atac whiñ lau menpañ am, gitôm am atac whiñ daôm.*” ¹⁵ Magoc mac bu alic daôm sac-sac me awhê daôm kôc-kôc, dec lêñ dinañ gitôm bu oc senñ mac su andiñam.

Lêḡ nom-ḡga, ma Nalau Dabuḡ ndê lêḡ

¹⁶ Bocdinaḡ wasôm têḡ mac bu asa nem lêḡ tôm Nalau Dabuḡ gêm gôliḡ mac, dec oc tôm dom bu akôm mêtê ḡalôm akwa-ḡga ḡandô sa. ¹⁷ Bu mêtê naḡ mac nem ḡalôm akwa bu êḡḡilí mac bu akôm, ma mêtê naḡ Nalau tac whiḡ bu mac akôm, naḡ sêtôm dau dom. ḡahu bu mac nem ḡalôm akwa ma Nalau Dabuḡ sic siḡ têḡ dandi, tu bu sênem gôliḡ mac-ḡga. Tu dinaḡ-ḡga dec mac atôm dom bu akôm tôm mac daôm atac whiḡ. Mac oc aḡkuc ḡalôm akwa ndê ḡagôliḡ, me Nalau Dabuḡ oc nem gôliḡ mac. ¹⁸ Magoc Nalau bu nem gôliḡ mac, dec mac ambo yomsu ḡapu tiyham dom.

¹⁹ Lau naḡ ḡalôm akwa gêm gôliḡ ḡac, naḡ si mêtê sac-sac tôc dau yêc awê. ḡac sêkôm mêtê mockaiḡ-ḡga, mêtê ḡadômbwi, ma mêtê atac ḡagalac-ḡga. ²⁰ ḡac sem akiḡ anötô tasaḡ, sêpec balö, sêkêḡ kisa lau, sêḡḡilí siḡ, tagatu gêḡ, ḡac lau atac ḡandê-ḡga, ma sêpo dau sa hôc gêlêc. ḡac si lêḡ kôm lau sêlic dau sac-sac e sêwhê dau kôc. ²¹ ḡac sem lêmuḡ lau ḡatô si gêḡ, ma êlême seḡ asam ti sênom gêḡ êḡiḡ ḡac-ḡga, ma sêkôm mêtê sac tidau-tidau bocdinaḡ. Aö wakêḡ puc mac, tôm gakêḡ puc mac su, bu lau naḡ sêsa lêḡ kaiḡ dinaḡ, naḡ oc sêwêkaiḡ si mala yêc Anötô ndê gamêḡ undambê-ḡga dom andô.

²² Magoc lau naḡ Nalau Dabuḡ gêm gôliḡ ḡac, naḡ sêsa lêḡ bocdec bu. ḡac atac whiḡ lau, sêmbô ti atac ḡayham, ma sêsa si lêḡ ti yom malô, sêkôc si ḡalôm dôḡ pi lêḡ agwa-agwa hoḡ, ḡac tawalô lau, sêkôm mêtê ḡayham eḡ, ma gwelenḡ bocke naḡ sêsôm bu sêkôm, naḡ sêkôm ḡandô sa. ²³ ḡac sêtoc dau sa dom, ma sêtimêtê dau ḡapep. Mêtê kaiḡ dinaḡ so

yomsu dan dom. ²⁴ Ma yac lau nan dati Yisu Kilisi ndê, nan dahu mêtê atac ñagalac-nga ti mêtê sac hon nan menj akêñ ñalôm akwa, nan sin, tôm yac tac ñalôm akwa ndu pi a gicso dau gi. ²⁵ Yac oc dandöc tanli tu Nalau Dabun ndê gwelen-nga, dec dakêñ Nalau ti gölin yac nenj lêt hon. ²⁶ Datoc daun sa dom, ma danem lêmun asidôwai ti dali ñac ñalôm sa dom.

6

Lêt ñayham ñatô

¹ O asidôwai, mac bu anyalê bu mac nem dan kôm sac, dec mac lau nan Nalau Dabun gêm gwelen ñanga yêc nem ñalôm, nan anshê bu anem in sa. Akôm lêt malô enj têt in, e in nem dau kwi ma sa Pômdau ndê lêt tiyham. Magoc ayob daôm bu lêtôm tap mac sa whin dom. ² Dahôc asidôwai si ñawapac dawhin ñac, ma ñalêt dinan yac oc dakôm Kilisi ndê yomsu atac whin asidôwai-nga ñandô sa. ³ Bu asa nan toc dau sa bu in ñamalac tiwaê hóc gëlêc ndê asidôwai su, nan kêsau dau. In ñamalac waêmba. ⁴ Anem dôhôn daôm nem lêt pi asidôwai ñatô si lêt tu bu apo daôm sa-nga dom. Mba. Mac tigen-tigen akôm gwelen bocke nan Anötö kêt sip mac amam, nan ñapep enj, dec oc ti mac nem ñahu apo daôm sa-nga. ⁵ Bu Anötö gic sam gwelen ti sakinj tidau-tidau têt yac tigen-tigen bu dawêkainj, ma bocdinar dakôc sa tôm ndi, ma dakôm ñapep. ⁶ Asa nan bu ndöc ñamalac dan ñapu tu êndôhôn Anötö ndê yom-nga, nan goc êmwasiñ in ndê kêdôhônwaga dau ña gêt ñayham-ñayham ñatô ndic ñawaê.

Anötö oc kên ñagêyô têtj lau êñkuc ñac si mêtê têtjêtj

⁷ Akôc gauc ñapep pi yom dindec. Mac atôm dom bu añsau Anötö ma asiñ gêtj dañ têtj iñ. Mba! Bu gêtj ñandô nañ datap sa yêc yac neñ ôm, nañ kêtuc gêtj ñawhê nañ dasô muñ. ⁸ Am bu kôm mêtê êñkuc lêtj ñalôm akwa-ñga, nañ gitôm am sô gêtj ñawhê sac yêc ôm, ma am oc tap ñandô sac sa. Am oc niñam tu ñalôm akwa-ñga. Magoc am bu kôm mêtê êñkuc Ñalau Dabuñ ndê atac whiñ, nañ gitôm am sô gêtj ñawhê ñayham. Ma am oc tap ñandô ñayham sa bocdec bu, Ñalau dau oc kên am ndöc tamli ñapañ.

⁹ Yac dakôm mêtê ñayham dasiñ su, ma lic ñakam dom. Yac bu dahu siñ dom, dec oc datap ñandô ñayham sa tôm ñandoc. ¹⁰ Tu dinañ-ñga têtj honj nañ Anötö kên têtj yac, nañ dakôm mêtê ñayham têtj lau honj. Ma dakôm hóc gêtjêc têtj lau sêkên whiñ Kilisi-ñga.

Yac datiwakuc iñ gêtj atu

¹¹ Alic yom ñalhô atu-tu dindec nañ aö daun amanj gato têtj mac.

¹² Lau nañ sêkac mac bu asôc yomsu sêsê ñamlic-ñga ñapu, nañ sêkôm gêtj dau ñahu bu sêtéc bu sêtáp kisa sa tu Kilisi ndê a gicso-ñga. Ñac atac whiñ bu lau Israel-ñga nañ sêkên whiñ Kilisi dom, nañ sêlic ñac ñayham. ¹³ Bu ñac lau dau sêsôc yomsu sêsê ñamlic-ñga ñapu su, magoc ñac sêtñkuc Anötö ndê yomsu ñatô honj dom. Ñac sêkac mac bu añkuc yomsu sêsê ñamlic-ñga, tu bu sêtóc dau sa pi gêtj nañ sêkôm têtj mac nem ñamlic-ñga ñambwa.

¹⁴ Magoc aö oc watoc daun sa pi gêtj tigenj, nañ gêtj atu nañ Pômdau Yisu Kilisi kôm têtj ndoc iñ

mbac ndu pi a gicso dau. Bu gêḅ dau gêm aö sa bu wahu mêtê ti lêḅ nom-ḅga hon siḅ, tôm aö gac pi a gicso gi. Ma ḅalêḅ dinaḅ tôm aö daḅḅ gambac ndu pi a gicso dau gawhiḅ. ¹⁵ Mac lau naḅ sêsê mac nem ḅamlic ḅatô su, ma mac lau naḅ sêsê mac dom, aḅyalê bu gêḅ dau iḅ ḅêḅ ḅambwa. Gêḅ atu tigeḅ bocdec yêc, naḅ bu dati lau wakuc tu Yisu Kilisi-ḅga. ¹⁶ Pômdau ndê yom malô ti tawalô têḅ mac hon naḅ aḅkuc ḅagôliḅ wakuc dindec. Mac atôm Anötö ndê lau Israel-ḅga wakuc.

¹⁷ Aö gatec bu ḅamalac daḅ kêḅ ḅawapac têḅ aö pi yom kaiḅ dindec tiyham. Lau sic aö ma sêkêḅ gôc daêsam têḅ aö tu kakuc Yisu-ḅga, naḅ whê aö sa bu iḅ ndê ḅgac akiḅ.

¹⁸ O aneḅ asidôwai. Mwasin akêḅ yac neḅ Pômdau Yisu Kilisi puc mac gatôm dôḅ. Yomandô.

Anötö ndê Yom Lêñsêḿ Wakuc
The New Testament in the Bukawa language of Papua
New Guinea

Nupela Testamen long tokples Bukawa long Niugini

copyright © 2000 Lutheran Bible Translators Australia

Language: Bukawa

Translation by: Lutheran Bible Translators Australia

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-13

PDF generated using Haiola and XeLaTeX on 21 Apr 2023 from source files dated 9 Oct 2020

545e5ca3-1e95-59e4-8380-93951e023cf7